

**Tuanku Mizan Zainal Abidin Terima Anugerah Tertinggi Indonesia
Bernama
16 Oktober , 2011
Oleh Ahmad Fuad Yahya**

JAKARTA, 16 Okt (Bernama) -- Jasa dan peranan Yang di-Pertuan Agong Tuanku Mizan Zainal Abidin dalam usaha meningkatkan hubungan baik dan kerjasama Malaysia-Indonesia mendapat pengiktirafan tertinggi Indonesia melalui anugerah bintang tertinggi republik itu.

Upacara penyampaian anugerah Bintang Republik Indonesia Adipurna itu oleh Presiden Susilo Bambang Yudhoyono berlangsung di Dewan Bilateral Istana Merdeka, di sini Ahad.

Upacara disaksikan Raja Permaisuri Agong Tuanku Nur Zahirah, Ibu Negara Ibu, Ani Yudhoyono, barisan kabinet kerajaan Indonesia dan para anggota delegasi Malaysia dalam rombongan lawatan baginda.

Ini adalah kali pertama anugerah itu disampaikan kepada Yang di-Pertuan Agong Malaysia.

Sebelum ini bekas Perdana Menteri Malaysia Tun Dr Mahathir Mohamad pernah diberikan anugerah yang sama oleh Indonesia.

Tuanku Mizan, yang berangkat tiba di sini untuk lawatan rasmi dua hari telah diberikan sambutan rasmi oleh Kerajaan Indonesia di Istana Merdeka pada sebelah petang.

Tembakan meriam 19 das dilepaskan sejurus baginda menerima tabik hormat daripada 60 anggota pasukan Kawalan Kehormatan terdiri daripada Pasukan Keselamatan Presiden di hadapan Istana Merdeka.

Baginda kemudian memeriksa kawalan kehormatan dipimpin Leftenan Satu Yudha Pratama.

Selepas diperkenalkan kepada barisan Kabinet Indonesia dan para pegawai kanan kerajaan Indonesia, Yang di-Pertuan Agong dan Raja Permaisuri Agong kemudian mengadakan kunjungan hormat ke atas Presiden Susilo dan Ibu Ani di Bilik Jepara, Istana Merdeka.

Malam ini tetamu diraja dan anggota delegasi Malaysia diraikan pada Jamuan Rasmi di Istana Negara.

---BERNAMA

Hakcipta© 2011 BERNAMA

Source: <http://www.bernama.com/bernama/v5/bm/newsindex.php?id=620271>